



Ustieras ed ustiers da Glion a chaschun da la radunanza da giubileum a San Murezzan.



Deputà Jon Domenic Parolini (san.) e Klaus Künzli, president central da Gastro Suisse.



Economia e gastronomia unida: Urs Schädler, Urs Schmid ed Ernst Wyrsch (da san.).



Fiuregn Fravi e Georgetta Dedual, durant onns las persunas che s'engaschan per il bain da Gastro Grischun e commembers.



Da buna luna er ustieras ed ustiers da Surmeir.



La suprastanza da Gastro Grischun: (davos da san.) Paula Vetter, Tamara Henderson ed Annalisa Giger; (davant da san.) Claudio Bernasconi ed Andy Abplanalp.

FOTOS G.N. STGIER

Vinavant blers quitads per ils ustiers

Radunanza da giubileum Gastro Grischun

DA GION NUTEGN STGIER / ANR

■ **En il center da la 100. radunanza generala da l'uniun è stada l'iniziativa che vul introducir en Svizra ina paja minimala per tuts employads. En in mais decida il suveran svizzer en quella chaussa. Suenter la radunanza ha lura gi lieu il grond banchet da festa per l'anniversari radund da l'uniun.** Glindesdi passà han las festivitads 100 onns Gastro Grischun cumenzà ed oz van quellas a fin en Valtellina cun ina visita sin il bain da vignas Plozza. A San Murezzan ha gi lieu la radunanza da giubileum e la festa uffiziala per l'anniversari radund. Preschents eran 230 ustiers e blers represchentants da la politica e da l'economia, ch'èn vegnids gugent per gratular a la giubilara, la Gastro Grischun. En noss chantun è quella la pli gronda associaziun professiunala cun vers 1000 commembers.

In president cun buns contacts tar la politica

A la testa da quella uniun è stà ils davos 25 onns *Andy Abplanalp* dad Arosa che ha demissionà cun esser da sanadad betg uschè en gamba. Per el è quella decisiun stada tut altra che simpla cun Andy Abplanalp esser gugent e cun cor president dals ustiers grischuns. En quel quart tschientaner è il pre-

sident partent stà la persuna cun ils buns contacts tar la politica, l'economia e lura er tar l'associaziun superiura, la Gastro Suisse. El ha lura er gi gronds meritis che l'associaziun è vegnida professionalisada, che Gastro Grischun ha pudì cumprar l'object Rosengarten a Cuira, amplifitgar quel e far or da quel in center da scolaziun per gastronoms e hoteliers. S'engaschè fitg ferm è Andy Abplanalp dentant er per la promozziun da la generaziun giuvna en la gastronomia. El vegn segir er en l'avvegnir a far quitads che adina damain mattas e mats sa decidan da far in emprendissadi da cuschinier, da cameriera ubain in'otra professiun en quella branscha. L'onn passà è il dumber da giuvenils che han cumenzà in emprendissadi en la gastronomia sa reduci bunamain per 20%. Donn saja, ha ditg Andy Abplanalp, er che en quels 25 onns saja betg reussi ad el ed a ses collegas e collegs da suprastanza da far or da Gastro Grischun e Hotellerieuisse Grischun be ina uniun. Cun in ferm e lung applaus han lura ils ustiers e las ustieras prendi cumià da lur president che vegn ad ir en l'istorgia da Gastro Grischun sco l'unic president d'onur fin ussa.

La gastronomia conuscha gia la paja minimala

In grond tema tar la radunanza da giubileum a San Murezzan en l'hotel Lau-

dinella è lura er stada l'iniziativa dal sindicat svizzer che vul fixar cun ina lescha ina paja minimala dad almain 4000 francs per mais. Sche quella iniziativa vegn acceptada lura s'augmentan er las autras pajas e cun ina summa da pajas pli auta vegnan intgins manaschis betg a surviver, è vegnì ditg.

Annalisa Giger, la vicepresidente da Gastro Grischun e la nova presidenta ad interim, ha lura er drizzà peds critics als iniziants da quella iniziativa. En la gastronomia è la paja minimala gia perscritta cun acceptar Gastro Suisse ed il sindicat il nov contract da lavur avant paucs onns. Oz gudogna per exempel in um sco lavatagliar 3400 francs per mais e cun la 13avla paja, ch'è obligatorica a partir da l'emprim di da lavur, èn quai stgars 4000 francs per mais. Lavura in pèr senza ina scolaziun en in hotel, gudogna quel oz bunamain 7600 francs ed ussa vegn il sindicat svizzer e vul anc auzar las pajas. Quai fiss segir la mort per numerus travagls gastronoms er en noss chantun. Il davos onn per exempel è il dumber dals commembers da Gastro Grischun sa reduci per 5% e sche las pajas vegnan anc pli autas, lura s'auza chel dumber dals ustiers che sortan da l'uniun segir.



A la gastronomia grischna mancan forzas giuvnas.